

Tan̄tan̄a tsghatá lwa 1 Yuhwana

Gwada Lazglafta ná, ta vlay ta hafu

¹ Nana skwi ta vindaghunafta ηni na ná, gwada ta ghəŋa mndu ta vla hafu ta nzakway daga ta kul zlraftá* inda skwi ya. Ta ghəŋa skwi snaŋ ηni nda skwi nghan̄ ηni nda ira ηni, nda ya vitsanava ηni, nda ya ksanaŋ ηni nda dzva ηni ta mnaghunata ηni. ² Na zlagapta tsa mndu ta vla hafu ya, ka nghan̄tá aŋni nda ira ηni. Tsaya kəl aŋni ka nzakway ka masləmtsəkani, kəl ηni ka mnay ŋa ghuni ta gwada ta hafu ŋa kdekeden̄ si ta nzaku tavata Da mu, ka maravatá† tsi ta wa ira mu. ³ Tsa skwi nghan̄ ηni nda ya snaŋ ηni ya, tsaya ta mnaghunata aŋni kada nzakwa kuni nda guya nda aŋni. Ka nda guya ghəŋa mu katsi, nda guya ghəŋa mu kawadaga nda Lazglafta Da, nda ya nda zwan̄ani Yesu Kristi. ⁴ Kada kd̄iŋta rfa mu‡ ta ndəghafta ta kəl ηni ka vindaghunaftá na skwiha na.

Mbada ma tsuwadək

⁵ Tsuwadaka nzakwa Lazglafta, had̄ skwi ka grum da tsi wu, na skwi snaŋ aŋni da tsi, ta mnaghunata aŋni. ⁶ Ka nda guya ghəŋa mu nda Lazglafta ka mu katsi, ta ghəŋa tsa tata mbada mu ma grum, tsakalawi tsa ta tsakalə mu, maga a mu ta skwi tdukwa wa. ⁷ Ala ka si ta mbadə ma tsuwadək mu ta mbada manda nzakwa Lazglafta

* **1:1** Gray nda 2:13. Yuhwana 1:1. † **1:2** Ngha ta Yuhwana 1:14.

‡ **1:4** Rfa mu: Ma sana vliha ná, rfa ghuni.

ma tsuwadək ya, nda guya ghəŋa mu sani nda sani nda tsa ŋa ghuβimista usa Yesu Zwanə Lazglafta ta inda dmakuha mu.

⁸ Ka had mu ta ga dmaku wu ka mu katsi ná, nana ghəŋa mu ta nanə mu, had kahwathwata ma amu nda tsa wa. ⁹ Ala ka si mniginmna mu ta dmakwa mu nda wa mu katsi, dza'a plimispla Lazglafta ta dmakwa mu, ŋa ghuβinṭani ta inda dmakwa mu§, ŋa nzakwa mu tsuwedek ta kəmani, kabga tsatsi Lazglafta tdukwa. Skwi mna tsi ta magamaga manda va tsaya. ¹⁰ Ka ta ga amu ta dmaku wu ka mu katsi, ta tsakalawi Lazglafta ka'a mu nda tsaya. Had tsa gwadani ya ma ŋudufa mu nda tsa tama wa.

2

¹ Zwana da, skwi kəl yu ka vindaghunaftá na skwi na ná, vindaghunaf vinda yu ŋa mbəl ŋa waray ghuni ta maga dmaku. Ala ka si magamaga mndu ta dmaku katsi, mamu mndu tdukwa ta nzaku tavata Lazglafta ta kla lwa mu ŋani. Tsa mndu ya, Yesu Kristi ya. ² Tsatsi ta mtuta ŋa pla ghəŋ kada plimista Lazglafta ta dmakuha* mu. Nza a ŋa pla dmakuha amu ndaghəŋa mu wu, laviŋlava ta pla dmakwa inda mnduha ta ghəŋa hadik demdem guli.

Lfida zlahu

³ Ka ta magay mu ta skwi ta mnamata Lazglafta katsi ná, tsaya ta maramanṭa kazlay: Nda sna mu kahwathwata ta Lazglafta kə'a. ⁴ Ka ka mndu mantsa, «nda sna yu ta Lazglafta,» ka'a, ta sna a

§ 1:9 Gray nda Zabura 32:1-5. * 2:2 Gray nda Ruma. 3:25-26.

ta skwi ta mnata Lazglafta kay guli wu, tsa mndu ya ná, ta tsakalawi. Had kahwathwata dekdék ma ndufani wa. ⁵ Mndu ta snatá gwada Lazglafta ná, dvudva ta Lazglafta kahwathwata. Tsaya ta gramafta kazlay: Nda ndi'a mu nda Lazglafta kə'a. ⁶ Ka nda ndi'a nzakwa da kawadaga nda Lazglafta, ka mndu katsi ná, ka maga tsi ta skwi manda na Yesu Kristi.

⁷ Zwanama da, ka lfidani a na zlahu ta vindaghunafta yu na wu, va tsa zlahu manda ghalya yeya. Nda sna kuni ta tsa zlahu ya daga ma zrafta† mnaghunata gwada Lazglafta. Va tsaya tsa gwada sana kuni ya. ⁸ An mndani, lfidani na zlahu ta vindaghunafta yu na, kabga nzakwa Yesu Kristi ná, varda lfi da nzaku ya maraman tsi. Mantsa ya kaghuni guli. Manda skwi ta had grum tama wu, ta zlagəzlagu varda tsuwadak.

⁹ Ka «ma tsuwadak yu» ka mndu ta gray, tata husanhusa zwanamani ta nzakway ma zlg hay nda nduf katsi ná, ta ma grum tsa mndu ya manda va nzakwani ghalya. ¹⁰ Ala ka ta dvay mndu ta zwanamani katsi, nda nza nzakwa tsa mndu ya ma tsuwadak, had sana skwi dza'a sabi da tsi na zlambinjta mndu wa. ¹¹ Mndu husan zwanamani ná, ma grum nzata nzakwani, ta tadamaku tsa mndu ya ma grum. Sna a ta vli ta mbada tsi ta mbada mida wu, kabga tdikanaf tdika grum ta irani.

Ma dvu kuni ta ghəna hadik

¹² Zwana da, ka yu ta vindaghunafta na: «Plighunis pla Lazglafta ta dmakuha ghuni, kabga slna

† 2:7 Ngha ta Yuhwana 13:34.

Yesu Kristi ta magata.» ¹³ Kaghuni dadaha, ka yu ta vindaghunafta na: «Nda sna kaghuni ta tsa mndu ta nzakway daga ta kul zlraftá‡ inda skwi ya.» Kaghuni duhwalha, ka yu ta vindaghunaftá kaghuni guli na: «Ghuḅasapghuḅasa kaghuni ta halaway.»

¹⁴ Kaghuni zwani, ka yu ta vindaghunafta na: «Nda sna kaghuni ta Da mu Lazglafta.» Kaghuni dadaha, ka yu ta vindaghunafta na: «Nda sna kaghuni ta tsa mndu ta nzakway daga ta kul zlraftá inda skwi ya.» Kaghuni duhwalha, ka yu ta vindaghunafta na: «Nda mbra kaghuni, nzamnza gwada Lazglafta ma kaghuni, ka ghuḅasaptá kuni ta halaway.»

¹⁵ Ma hara’u kuni ta tva nzakwa mnduha ma ghəṇa hadik. Ma laghu kuni ngha skwiha ma ghəṇa hadik. Ka laghula mndu da hara’uwa skwiha ma ghəṇa hadik katsi ná, dva a tsa mndu ya ta Da mu Lazglafta wa. ¹⁶ Skwi ta magə mnduha ma ghəṇa hadik ná, maga skwi kumaf slu’uvgha taṇ nda skwi kumaf ira taṇ ya. Mutsafta taṇ kay guli, glay taṇ ta ghəṇ nda tsi. Mndərga tsahaya ma nzaku ná, Da mu Lazglafta a ta taghamafta wu. Na na ghəṇa hadik na mndərga tsaya. ¹⁷ Dina ka snaṇta kaghuni kazlay: Ta kdakukdaku nana ghəṇa hadik na kə’a. Inda na skwiha ta mamə mnduha na guli ná, dza’a kdúkda. Mndu ta maga skwi ta kumə Lazglafta ya ná, tsaya mndu dza’a nzata nda hafu ṇa kdekedzen.

Ghuma Kristi

‡ 2:13 Gray nda 1:1.

¹⁸ Zwana da, ndusa ghəŋa hadik ka kɔaku, manda va ya snaŋ kuni kazlay: Dza'a saghasa ghuma Kristi kə'a ya ná, daga ndana ná, sli'agapsli'a ghumaha Kristi. Tsaya ta gramaftha kazlay: Ndusa kɔakwa ghəŋa hadik[§] kahwathwata kə'a. ¹⁹ Tsa ghumaha ya ná, mataba mu sli'agapta həŋ. Si nza a nzakwa taŋ kawadaga nda amu wa. Ka má nda nza nzakwa taŋ kawadaga nda amu ná, má gɔavagɔa həŋ tavata amu. Magamaga manda tsaya kabga ŋa snaŋta kazlay: Mataba amu a həŋ demdem wu kə'a.

²⁰ Kaghuni ya, vlaghunavla Kristi ta Sulkumani. Kaghuni demdem, nda sna kaghuni ta vərɔa skwi ta ghəŋa Yesu Kristi. ²¹ Kəl yu ka vindaghunafta na: «Kwalaghuni kul snaŋtá vərɔa skwi a wu, kabga nda sna kuni.» Nda sna kuni guli kazlay: Guya a tsakalawi ta vgha nda kahwathwata wu kə'a.

²² Wa va na mghama tsakalawi na? Mndu ta vziŋtá Yesu kazlay: Kristi a wu, ka'a a tsa wa. Tsa mndu ya ná, ghuma Kristi ya ta vziŋta i Lazglafta nda Yesu tani ya. ²³ Dər wati ma mndu ta vziŋtá Zwaŋa Lazglafta ná, haɔ tvani ŋa nzuvta nda Lazglafta ta nzakway ka Dani wa. Ala dər wati ma mndu ta mnay banluwa kazlay: Yesu ná, Zwaŋa Lazglafta ya kə'a, nda nza nzakwani nda Lazglafta ta nzakway ka Dani* guli.

²⁴ Kaghuni, ŋanawa ŋa ta tsa skwi snaŋ kuni daga zlafta ghuni ta zlglaftá gwada Lazglafta ya. Ka ŋanaŋa kuni ta tsa skwi snaŋ kuni daga zlafta

§ 2:18 Ngha ta Mata 24:5, 23-24, Markus 13:21-22. * 2:23 Ngha ta Mata 11:27, Yuhwana 5:23, 15:23.

ghuni ta zlgħaftá gwađa Lazglafta ya katsi, dza'a gđavagđa nżakwa ghuni kawadaga nda Zwan̄ nda Lazglafta guli. ²⁵ Ka Kristi tamaftá imi ta sləmən̄ ná, dza'a vlaghunavla yu ta hafu ŋa kđekedzen̄, ka'a.

²⁶ Vindaghunafvinda yu ta tsa skwiha ya, kabga ka maga kuni ta đasuwa nda tsa gwal ta kuma hla sála ghuni ya. ²⁷ Kaghuni, tsa Sulkum vlaghuna Kristi ya ná, ta nzaku ma kaghuni. Wya ta mamu tsa Sulkum ya ma ŋuđufa ghuni ya, psəgla a kuni ta sana mndu ŋa taghaghunaftá sana skwi wu, kabga ta taghaghunaftagha tsa Sulkum ya ta inda skwi. Tsa skwiha ta taghaghunafta tsi ya guli ná, vərđa skwiha ya. Had̄ tsakalawi mida wa. Gđavawagđa kawadaga nda Yesu Kristi manda ya ta taghaghunafta Sulkumani.

²⁸ Mantsa tama zwana đa, gđavawagđa kawadaga nda Yesu Kristi, ŋa kwala zləŋ ksa amu bađu vragata dza'a vragata tsi, ŋa kwala hula ksa amu guli ta kəmani.

Zwana Lazglafta amu

²⁹ Ka si nda sna kuni kazlay: Tuđukwa mndu Yesu Kristi kə'a, nda ra guli ka snaŋta ghuni kazlay: Gwal ta maga skwi tđukwa ná, zwana Lazglafta həŋ kə'a.

3

¹ Nghawa ka Da mu Lazglafta đvutá amu 6a! Zwana đa kə'a ta hga amu. Manda va tsaya nżakwani guli, zwana Lazglafta* amu. Tsaw sna a mnduha ma ghəŋa had̄ik ta amu wu, kabga sna a

* **3:1** Ngha ta Yuhwana 1:12.

həŋ ta Lazglafta wa. ² Zwanama dá, daga ndanana zwana Lazglafta amu. Nziya nza tsi, tsa nzaku ká mu dza'a nzakway ta kəma ya ná, ta ma dífa karaku. Tsaw nda sna amu kazlay: Bađu vragata dza'a vragata Kristi ná, dza'a nzakway amu manda tsatsi kə'a, kabga dza'a nda ngha mu ta nzakwani. ³ Ka si mantsa tsi katsi, inda mndu ta faftá ghəŋani ta Kristi ná, dza'a waray ta ghəŋani da dmaku manda ŋa Kristi kul gatá dmaku ya.

⁴ Ka ta gđagđá mndu ta maga dmaku katsi ná, sna a tsa mndu ya ta zlahá Lazglafta wa. Dmaku ná, kwal kul sna zlahá Lazglafta ya. ⁵ Wya nda sna kaghuni kazlay: Sasa Yesu Kristi ta ghəŋa hadik da klaghutá dmakwa mnduha kə'a. Tsatsi ná, had' dmaku dekdek tida wa. ⁶ Inda mndu ta gđavata kawadaga nda Yesu Kristi ná, had' ta gəgəltá dmaku wa. Inda mndu ta gđata ta maga dmaku guli ná, ta tsatsaf a ta Yesu Kristi wu, ta sna a guli wa.

⁷ Mantsa tama zwana dá, ma snə kuni ta bara mnduha. Mndu ta gđata ta maga skwi tđukwa ná, tđukwa tsa mndu ya manda nzakwa Yesu Kristi ka mndu tđukwa ya. ⁸ Mndu ta gđata ta maga dmaku ná, mista halaway tsa mndu ya, kabga ta maga dmaku halaway daga ka yawu zraftani ta gata. Tsaya kəl Zwanə Lazglafta ka saha. Sahani ta ghəŋa hadik ná, ŋa zliŋtá slna halaway.

⁹ Dər wati ma mndu ta nzakway ka Zwanə Lazglafta, had' ta ga dmaku wu, kabga mamu Sulkuma Lazglafta ma ŋudufani. Had' ta kdəŋtá maga dmaku dekdek wu, kabga nda nza Lazglafta ka Dani. ¹⁰ Dər wati ma mndu kul had' ta maga skwi tđukwa, nza a tsa mndu ya ka Zwanə

Lazglafta wa. Mantsa ya mndu kul d̄va zwanamani guli. Ta tsahaya ta tsatsafta lu ta nzakwa zwana Lazglafta nda nzakwa zwana halaway.

Dvuma mndu manda ŋa Kristi

¹¹ Daga zlrafta ghuni ta zlghaftá gwada Lazglafta mnaghunata lu kazlay: Dvumad̄va ta sani nda sani† kə'a. ¹² Yaha amu da nzakway manda Kayinu. Tsatsi ná, nda nza ka zwan̄a halaway, ka dzatá tsi ta zwan̄amani. Kabgawu kəl tsi ka dzata na? Kabga ghwadaka skwi ŋa Kayinu ta magay, t̄dukwa‡ skwi ŋa tsa zwan̄amani ya ta magay, kəl tsi ka valafta tida ka dzata.

¹³ Zwanama d̄a, ka ta husan̄husa§ kuni ta mnduha ma ghəŋa had̄ik katsi, yaha da nzakway ka skwa ndərmimay da kaghuni. ¹⁴ Amu ná, nda sna amu kazlay: Sabsa amu ma mtaku ka nzata nda hafu* kə'a, kabga ta d̄vuta amu ta zwanama mu. Mndu kul d̄va zwan̄amani ná, ma mtaku ta ḡdavata tsatsi. ¹⁵ Mndu husan̄ zwan̄amani ná, mnda dzatá mndu tsa mndu ya. Nda sna kaghuni guli kazlay: Mndu ta dzatá mndu ná, ta mutsa a hafani ŋa k̄dekeden̄ wu kə'a. ¹⁶ Wya tvi kəl amu ka snan̄tá skwi ta hgə lu ka d̄va mndu: Dvud̄va Yesu Kristi ta amu, ka saha tsi vlatá ghəŋani ma vla amu. Amu guli ná, vlamavla amu ta ghəŋa mu guli ma vla zwanama mu. ¹⁷ Ka mamu skwi da mndu, ka nghan̄tá tsi ta zwan̄amani ta p̄day, ka laghu tsi da nghan̄y nda iri† katsi ná, laviŋ a tsa mndu

† **3:11** Ngha ta Yuhwana 13:34. ‡ **3:12** Ngha ta Zlrafta 4:1-8. § **3:13** Ngha ta Lukwa 6:22, Yuhwana 15:18-19. 17:14. * **3:14** Ngha ta Yuhwana 5:24. † **3:17** Ngha ta Vrafta ta Zlahu 15:7-8.

ya ta mnay kazlay: Ta đvay yu ta Lazglafta kə'a wa. ¹⁸ Zwana da, gwaday ma wi kwenkwen a đva zwanama wa. Đvamađva kahwathwata ma ηudufa mu, ka maga mu ta skwi manda tsaya.

¹⁹ Mantsa ya dza'a grafta mu kazlay: Ta mbađə ta vərđa tvi mu ta mbađa kə'a. Tsaya tama ná, nda lba ηudufa mu ta kəma Lazglafta. ²⁰ Ka ta dga ghəη mu ta ghəηa skwi maga mu katsi, nda sna amu kazlay: Mal Lazglafta nda sna ta inda skwi ta magə mu ka ηudufa mu kə'a. ²¹ Zwanama da, ka had dga ghəη ta dgə mu ta ghəηa skwi maga mu wu katsi, wadāh vgha mu ta sladu ta kəma Lazglafta. ²² Đər má nu đawan mu da tsi ta vlamavla kabga ta snanasna mu ta zlahani, ta maganamaga mu ta skwi ta zdəganata. ²³ Ká tsa zlahā Lazglafta ya ta mnay na: «Fafwafa ta ghəηa ghuni ta hga Yesu Kristi zwanani, ka đvuvusta kuni ta vgha ghuni sani nda sani,» ka zlahani ta mnamata‡. ²⁴ Mndu ta sna zlahā Lazglafta ná, ta gđavagđa kawadaga nda Lazglafta, ta gđavagđa Lazglafta guli kawadaga nda tsatsi. Nda sna amu guli kazlay: Ta gđavagđa Lazglafta ma amu nda ma Sulkum ya vlama tsi kə'a.

4

¹ Zwanama da, ma gi sna kuni ta gwada mndu ta mnay kazlay: Mamu Sulkuma Lazglafta ma i'i kə'a ya. Đaslawa tsa skwi ta mnə tsi ya karaku, ka mamu Sulkuma Lazglafta* mida, ka had wa a tsi. Kəl yu ka mna tsaya ná, kabga nda ndəgha ghwadaka anabiha ta sli'agapta ta ghəηa hadik.

‡ **3:23** Ngha ta Yuhwana 13:34, 15:12, 17. * **4:1** Ngha ta Vrafta ta Zlahu 13:2-6.

² Ka mnaghunamna yu ká kuni dza'a graftá mndu nda Sulkuma Lazglafta mida 6a: Ka ta mnay mndu kazlay: Yesu ná, Kristi ya, sa daga da Lazglafta, ka yatá lu, ka mndu kə'a ná, mamu Sulkuma Lazglafta ma tsa mndu ya. ³ Ka had tsa mndu ya ta mnay kazlay: Manda tsaya nzakwa Yesu kə'a wu ná, had Sulkuma Lazglafta ma tsa mndu ya wa, sulkuma ghuma Kristi mida. Nda ghada snan̄ta ghuni ta mnay kazlay: Dza'a saghasa tsa ghuma ya kə'a. Nda ghada saghani ndanana tama ta ghəŋa hadik.

⁴ Kaghuni zwana dá, zwana Lazglafta kaghuni, ghuḅasapghuḅasa kaghuni ta tsa gwal nana mndu ya, kabga mal tsa Sulkum ma kaghuni ya mbratani ka tsa sulkum ma gwal ma ghəŋa hadik ya. ⁵ Hahəŋ ná, ŋa ghəŋa hadik həŋ. Tsaya ta kəl həŋ ka mna skwi ta zdəganatá mnduha ma ghəŋa hadik. Ta fana fa mnduha ma ghəŋa hadik ta sləməŋ ta həŋ guli ka snay. ⁶ Amu ná, zwana Lazglafta mu. Mndu nda sna ta Lazglafta ná, ta snay ta skwi ta mnə ŋni. Ka Zwan̄a Lazglafta a mndu wu katsi ná, fa a ta sləməŋ ka sna skwi ta mnə ŋni wa. Mantsa ya ta tsatsafta mu ta gwal nda vərda Sulkum ma həŋ nda gwal nda sulkuma nana mndu ma həŋ.

Lazglafta ná, d̄vu ya

⁷ Zwanama dá gwal d̄vu yu, gd̄magda ta d̄vutá sani nda sani. Tva d̄vutá mndu ná, ta sagha daga da Lazglafta. Inda mndu ta d̄vutá mndu guli ná, nda na tsa mndu ya ka Zwan̄a Lazglafta, nda sna ta Lazglafta guli. ⁸ Mndu kul d̄vutá mndu ná, sna a tsa mndu ya ta Lazglafta wu, kabga

nzakwa Lazglafta ná, d̄vu ya. ⁹ Wya ká Lazglafta maramañtá tva d̄va mndani: Ghunagaghuna ta zwaṇani turtuktuk ta ghəṇa had̄ik kada nzakwa mu nda hafu ma tsatsi†. ¹⁰ Tin̄əl Lazglafta ta d̄vutá amu ka ghunagatá tsi ta Zwaṇani ka saha da mtuta ṇa pla ghəṇ ṇa plamata Lazglafta ta dmakwa‡ mu. Tsaya na v̄rdá d̄vutá mndu, da thə amu kazlay: Tin̄əl amu ta d̄vutá Lazglafta kə'a.

¹¹ Zwanama da gwal ta d̄vu yu, ka si mantsa ya d̄vuta Lazglafta ta amu katsi ya, d̄vama d̄va amu guli ta vgha mu sani nda sani. ¹² Had̄ mndu ta kəd nghan̄tá Lazglafta§ nda irani wa. Tsa d̄vutá vgha mu ta d̄vuta mu sani nda sani ya ná, nzakwa Lazglafta ta gd̄avata kawadaga nda amu tsa. Ta d̄vud̄va mu ta Lazglafta dar manda ya kumaṇ tsi kə'a guli.

¹³ Lazglafta ná, vlamavla ta Sulkum. Tsaya kəl mu ka grafta kazlay: Ta gd̄avagd̄a amu kawadaga nda tsi, tsatsi guli ta gd̄avagd̄a kawadaga nda amu kə'a. ¹⁴ Ghunaga ghuna Lazglafta ta zwaṇani ta nzakway ka mnda mba mndu ta ghəṇa had̄ik*, ka nghan̄tá aṇni nda ira ṇni, tsaya ta mnə aṇni ṇa mnduha. ¹⁵ Mndu ta mnay ban̄luwa kazlay: Yesu ná, Zwaṇa Lazglafta ya kə'a, nda nza nzakwa Lazglafta nda tsa mndu ya, nda nza nzakwa tsatsi guli nda Lazglafta. ¹⁶ Amu ná, nda sna amu kazlay: D̄vud̄va Lazglafta ta amu. Ta tsaya fafta amu guli ta ghəṇa mu.

Lazglafta ná, d̄vu ya. Tsaya tama, mndu ta gdata ta d̄va mndu ná, nda nza nzakwani nda Lazglafta

† **4:9** Ngha ta Yuhwana 3:16. ‡ **4:10** Ngha ta 2:2. § **4:12** Ngha ta Yuhwana 1:18. * **4:14** Ngha ta Yuhwana 3:17, 4:42.

nda nza nzakwa Lazglafta guli nda tsatsi. ¹⁷ Dza'a kəl amu ka grafta kazlay: Ta đvay amu ta Lazglafta dar kə'a ná, wya tsi: Bađu tsa fitik dza'a tsə Lazglafta ta guma ta ghəŋa mnduha ya ná, had amu dza'a zləŋa tsa guma ya wu, kabga nda nza nzakwa mu ta ghəŋa hadik ka guram nda Yesu. ¹⁸ Ka nda sna amu kazlay: Đvuđva Lazglafta ta amu, had amu dza'a zləŋay wa. Tsa đvutađvu Lazglafta ta amu ya ná, ta hliŋtá zləŋ dekdek ma amu. Ala, ka tata zləŋ mndu katsi, murmura ŋuđufani, ta fa a ghəŋani ta tsa đvuđvu Lazglafta ya wu, kəl tsi ka zləŋ.

¹⁹ Amu ná, đvuđva mu ta Lazglafta kabga tinəl tsatsi ta đvuta amu. ²⁰ Ka «đvuđva yu ta Lazglafta» ka mndu, tata husaŋhusa zwanamani katsi ná, tsakalawi tsa ta tsakal tsa mndu ya, đvu a ta Lazglafta wa. Ka đvu a mndu ta zwanamani ya nghan tsi nda irani wu katsi ná, waka a dza'a đvutá Lazglafta ya kul nghan tá tsi na? ²¹ Ka đvuđva yu ta Lazglafta ka mndu katsi ná, ka đvuđva tsi ta zwanamani† guli, ka zlaha Kristi mnata.

5

Zlghafta ta Zwanja Lazglafta, tsaya ghubasaptá ghəŋa hadik

¹ Dər wati ma mndu ta zlghaftá mnay kazlay: Yesu ná, Kristi ya kə'a, tsa mndu ya ná, nda na ka Zwanja Lazglafta. Ka đvuđva tsa mndu ya ta Dani Lazglafta katsi ná, dza'a đvuđva guli ta zwana Lazglafta. ² Ka đvuđva mu ta Lazglafta, ta snay mu ta zlahani guli ná, tsaya kəl amu ka snan ta

† 4:21 Ngha ta Mata 22:36-40, Markus 12:28-31, Lukwa 10:25-28.

d̄vud̄va mu ta Zwana Lazglafta kə'a. ³ Snata mu ta zlaha Lazglafta ná, tsaya d̄vafta mu ta Lazglafta kahwathwata. Bla a tsa zlahuhani* ya guli wa. ⁴ Inda zwana Lazglafta ná, ghuḅasapghuḅasa həŋ ta ghəŋa hadik. Nda ghuḅasa ghəŋa hadik, kabga nda fa ghəŋa mu ta Yesu Kristi. ⁵ Wa mndu ta ghuḅasaptá ghəŋa hadik na? Ba mndu ta zlghafta kazlay: Yesu ná, Zwanja Lazglafta ya kə'a ta ghuḅasapta.

Masləmtsəka Yesu Kristi

⁶ Yesu Kristi ná, sasa ta ghəŋa hadik, ka lamə tsi nda ma ima batem, ka pghintá tsi ta usani ma mtakwani†. Lami nda ma ima batem kwenkwenj yeya wu, pghinpgħa ta usani guli. Sulkuma Lazglafta ta mnamatá tsa skwiha ya kazlay: Mantsa ya nzakwani kə'a, kabga had tsatsi ta tsakalawi wa. ⁷ Hkən skwi‡ ta maraman̄ta kazlay: Yesu ná, Zwanja Lazglafta ya kə'a. ⁸ Tsa skwiha hkən ya ná, mamu Sulkuma Lazglafta, nda imi, nda us. Tsa skwiha hkən ya ná, ka skwa turtuk gwadā taŋ. ⁹ Ka si ta tsu'ay mu ta gwadā ta mnata mnduha ta ghəŋa skwi ta nghan̄ta həŋ ya ní, malaghumala a ŋa Lazglafta ma gwadā ta mnata, ka ŋa mnduha ra? Lazglafta ka ghəŋani ta mnan̄tá tsa skwiha ya ta ghəŋa zwan̄ani. ¹⁰ Mndu ta zlghaftá Zwanja Lazglafta ná, nda sna tsatsi kazlay: Kahwathwata tsa skwiha ya kə'a. Mndu kul zlghaftá Lazglafta guli ná, niŋna ta Lazglafta ka tsakalawi, kabga kwalani kul zlghaftá skwi mna Lazglafta ta ghəŋa zwan̄ani. ¹¹ Vlamavla Lazglafta

* 5:3 Ngha ta Yuhwana 14:15. † 5:6 Ngha ta Yuhwana 19:34.

‡ 5:7 Ngha ta Vrafta ta Zlahu 19:15.

ta hafu ŋa kdekedzen. Tsa hafu ya guli ná, nda ma zwanjani Yesu ta mutsakwa tsi. Mantsa ya ka Lazglafta mnamata. ¹² Mndu ta zlgħaftá Zwanja Lazglafta, nda mutsa hafani. Mndu kul zlgħatá Zwanja Lazglafta guli ná, mutsa a hafaniŠ wa.

Hafu ŋa kdekedzen da Lazglafta

¹³ Vindaghunaf vinda yu ta tsa skwiha ya, ŋa kaghuni gwal ta zlgħaftá Zwanja Lazglafta, kada grafta kuni kazlay: Mutsafmutsa kuni ta hafu ŋa kdekedzen kə'a. ¹⁴ Ta lagha mu ta kəma Lazglafta da dawa skwi manda ya ta zdəganata ná, har ghəŋa mu, kabga ta snamasna. ¹⁵ Ka nda sna mu kazlay: Ta snamasna ta inda skwi ta dawu mu da tsi kə'a, nda sna mu guli kazlay: Ta vlamavla kahwathwata ta inda skwi dawəŋ mu kə'a.

¹⁶ Ka nda ngha mndu ta zwanjani ta ga dmaku, dza'a kwal kul klagħata da mtaku ŋa kdekedzen katsi, ka maga tsi ta du'a da Lazglafta ta ghəŋa tsa mndu ya ŋa vlanja Lazglafta ta hafu. Tsa hafu ya, ŋa gwal ta ga dmaku dza'a kwal kul klagħatá həŋ da mtaku ŋa kdekedzen dza'a vla lu. Mamu dmaku ta kla mndu da mtaku ŋa kdekedzen. Mna a i'i kazlay: Ka maga kuni ta du'a da Lazglafta ta ghəŋa mndərga tsaya kə'a wa. ¹⁷ Inda skwi ta magə lu kul dīnaku ná, dmaku ya. Nziya nza tsi, mamu dmaku kul haď ta kla mndu da mtaku ŋa kdekedzen.

¹⁸ Nda sna amu kazlay: Dər wati ma mndu ta nuta ka Zwanja Lazglafta ná, haď ta gəgəltá dmaku wa. Zwanja Lazglafta ta nghay, laviŋ a halaway ta ksəŋta wa.

Š 5:12 Ngha ta Yuhwana 3:36.

¹⁹ Nda sna amu kazlay: Nda na amu ka zwana Lazglafta kə'a. Sanlaha ma mnduha ta ghəŋa hadik ná, ta ma dzva halaway həŋ demdem.

²⁰ Nda sna amu guli kazlay: Sasa Zwaŋa Lazglafta ta ghəŋa hadik ka vlamatá tsi ta dífil ŋa snaŋtá vərda Lazglafta kə'a. Ka ndi'aftá mu ta vgha nda vərda Lazglafta nda ya nda zwaŋani Yesu Kristi. Tsatsi ná, vərda Lazglafta ta vlamatá hafu ŋa kdekeden ya.

²¹ Zwana da, dasuwa ka kuni, yaha kuni da ŋana vgha nda skwa wuyay.

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 22 Feb 2024 from source files
dated 29 Jan 2022
f257b780-c0dd-5cce-9b20-430484439898